

Hebreos, mé carta cuahan nuú na Israel

Nachindahá Ndióxi Jesucristo ña ná quixi a jáyaha tuhun Ndióxi nu yo

¹ Cuahá ndivaha tañu nacahan Ndióxi sanahá xihin tásáhnú jíco yo. Ta cuahá ndivaha nuú nacahan xihin ná tá najáyaha na profeta tuhun cahan mé á nuú ñayivi.

² Joo tiempo nu ndíhi yóho nachindahá mé á Jesucristo, in túhún jini já jahyi a ña ná jáyaha tuhun Ndióxi nu yo viti. Ta nacaja Ndióxi ña nacavaha Jesucristo ndijáá ñaha ñuyivi xihin ñaha indivi. Ta najándacoo Ndióxi tóco ndihi ñaha yóho ndáha mé á.

³ Ta mé á quéa náha ndá quiahva cáhnu cúu Ndióxi jáchi yéhe a tá quiahva yéhe Ndióxi. Ta tá quiahva cáa Ndióxi quiahva já cáa ri Jesucristo, jahyi a. Ta xihin tuhun cahan yúhu mé á cómi a cuénta saha tóco ndihi ñaha jáchi in ndivaha ndée tuhun mé á. Ta nandaja víí mé a mí nuú ndihi cuachí ta já nasacoo a indivi xoo cuáha Ndióxi, tátá a.

Cáhnu chága Jesucristo a juú ga tátó Ndióxi

⁴ Ta Jesucristo, mé jahyi Ndióxi naxinu a nanduu a ña cáhnu chága a juú ga tátó Ndióxi. Ta nacaja Ndióxi ña ná ñehe táhvi á ña cáhnu chága quivi naní a a juú ga quivi tátó mé á.

⁵ Jáchi a ñaha cachi Ndióxi xihin ni in túhún toho tátó mé á tá quiahva nacachi a xihin jahyi a já:

Jahyi yehe cúú yóhó,
 ta viti cáchí i ña nanduu u tátún, cáchí a.
 Ta ni coó ñacachi Ndióxi xihín ni in túhún toho tátó
 á tá quiahva ñacachi a xihín jahyi a já:
 Yehe cacuu u tátún,
 ta yóhó cacuún in túhún jini já jahyi yehe, cáchí a.
 6 Joo tá jalóho cúni chindahá Ndióxi Jesucristo,
 jahyi a ñuyívi yóho já ñacachi a já:
 Nditahan nu tóco ndihi tátó mí i caja cáhnu na jahyi
 i, ñacachi a.
 7 Já ñacachi Ndióxi já saha tátó mé á:
 Tá quiahva cama chá xícó tachí quiahva já cama
 chá cuahān tátó mí i.
 Ta yehe na tá quiahva yehe ñuhú cáyi ita, já ñacachi
 Ndióxi.
 8 Joo tá ñacahan Ndióxi sahá jahyi a já ñacachi a já:
 Yóhó cúún Ndióxi ta cacomún cuéntá sahá ñayivi
 anda ama cáa quivi,
 ta cáhndún chuun xihín ña ndaa.
 9 Ta a juú quiahva catóún ña vaha ta ñacandajún
 ña núu.
 Sahá ña cán quéa ñacaxi i yohó jáchi yehe cúú u
 Ndióxi ta cúú u tátún.
 Ta najácutú ndaa i yohó xihín ña cáji inún já
 ná cajji chága inún a juú ga na xica xuhun,
 ñacachi a.
 10 Ta jári já ñacachi a já xihín jahyi a:
 Ñacavahún tóco ndihi ñaha tá ñacava sahá saha
 ñuyívi ta cúún xitoho nuú ña cán.
 Ta xihín ndáhun ñacavahún indiví.
 11 Ta vaxi quivi tá ndihi saha tóco ndihi ña yóho joo
 mún coo tá coún anda ama cáa quivi.

Ta tóco ndihi ña jan cayatá ña tá quiahva cayatá jáhma ndíxi na.

12 Tá quiahva sáhnü ñayivi jáhma quiahva já chichahnún ñuyívi xihín indiví.

Ta tá quiahva ndíjama ñayivi jáhma ndíxi na quiahva já ndijama ña jan cajún.

Joo mún a ndíjama tohún jáchi coo tá coún anda ama cáa quívi,

ta a ndíjama tohún ta a ndíhi toho sahún, nacachi Ndióxi xihín Jesucristo.

13 A ñaha cachi Ndióxi xihín ni in túhún toho tátó mé á tá quiahva nacachi a xihín jahyi a já:

Naha quí cacoun xoo cuaha i yóho,

janda quiahva ná cahnu i nu tóco ndihi na co cúní yohó ta janda ná chinduu u na sahún jan, nacachi Ndióxi xihín Jesucristo.

14 Jáchi tóco ndihi tátó Ndióxi cúu ná na tácu ta ín ínimá ná joo coó toho yiquí cuñu na. Cája chúun na cuéntá Ndióxi ta mé á chindahá a na ñuyívi ña ná chindeé na ñayivi, na nacaxi Ndióxi cacu ndaa ínimá.

2

Naquixi Jesucristo jácacu a mí

1 Sahá ña cán quéa ndítahan nu yó taa johó í ña ndaa, ña naxini johó í já ná a cáxoo í íchi cuéntá Ndióxi.

2 Nacahan tátó Ndióxi tuhun nasahan mé á nu ná ta cúu á ña ndaa joo coó naxeen ñayivi cacu vaha na ña. Sahá ña cán quéa najándoho Ndióxi ini na tá quiahva ndítahan ndoho ini na sahá cuachi nacaja na.

³ Joo mí, ndaja caja í cacu ndaa ínima yo tá ta co taa johó í tuhun cáhan sahá Jesús, mé a jácacu mí. Ta ña yóho cúú á ña cáhnu ndivaha jáchi jihna ñúhú ga mé Jesucristo, xitoho í naçaxi tuhun a ña yóho nuú ñayivi. Ta na nataa johó nu cáhan mé á, na cán sahan na tuhun na nu yo ña cúú á ña ndaa.

⁴ Ta náha Ndióxi ña cúú á ña ndaa jáchi cája mé á cuhá ndivaha ña náhnu xihín ña xítuhún ndivaha. Ta nachindahá Ndióxi ínima yíi mé á nuú na cúú cuéntá Jesús ña ná caja na ña xítuhún tá quiahva nasacu ini mé á caja na.

Nanduu Jesucristo in ñayivi

⁵ Coó nasahan toho Ndióxi ñamaní nu tátó mé á ña ná cacomí na cuéntá sahá ñuyívi saá, ña vaxi chága chí nuu.

⁶ Jáchi já cáchi tuhun Ndióxi já:
Tátá Ndióxi, coó saha toho ñayivi ta coó ña náha cúú ná.
Joo mé ndó ñúhu ini ndó saha ná ta ndíhi ini ndó saha ná.

⁷ Tá naçavaha ndó ñayivi nandaja ndó na nanduu na ña náhnu ndivaha.
Ta tátó mé ndó cuití va cúú ná nasayojó loho nu ná tixi chá tiempo.
Ta tóco ndíhi ña naçavaha ndó nandiquiahva ndó ña ndahá ñayivi,

⁸ Já ná cacomí na cuéntá sahá, cáchi tuhun Ndióxi.
Ta mé a ndaa ni in ñaha coó naçandoo xóo jáchi nasacu ini Ndióxi cacomí ñayivi cuéntá saha tóco ndíhi ñaha joo cámani yíi va xinu coo mé quívi cán.
⁹ Vatí cámani yaha ña yóho joo xíni yo ña nandoho Jesús. Tixi chá tiempo naçaja Ndióxi ña ná nuu

ndáha chága mé á nu táto Ndióxi jáchi sahá ña quíhvi ini Ndióxi mí sahá ña cán quéa nasacu ini a ña ná quivi Jesucristo sahá ndihi ñayivi. Ta viti nandindita mé á nanduu a ña cáhnu ndivaha sahá ña nandoho a tá naxihi a ndica crúxu.

¹⁰ Tóco ndihi ñaha ña nacavaha Ndióxi cúu á cuénta mé á sahá ña nacachi mé á ña ná coo a. Ta nasacu ini a ña ná ndoho ini Jesucristo quivi a saha yo. Ta xihín ña yóho najáxinu coo a nuú chuun natahnda nu á ña ná jácacu a mí. Jáchi ña cúni Ndióxi cúu ña ná canduu ndihí, na cúu cuénta mé á nu ín a.

¹¹ Nandaja vii Jesucristo mí ta sahá ña yóho cúu yó jahyi Ndióxi. Ta viti Ndióxi cúu tátá ndihí ta cúu á tátá Jesucristo. Ña cán quéa co cácan toho nuú Jesucristo cahan ñani a mí ta cahan quiahva mí viti.

¹² Jáchi nacahyi ini tuhun Ndióxi ña nacahan Jesús xihin tátá a. Ta nacachi a já:

Ndicani i nuú ñani i saha mé ndó.

Ta nu ndítútú na cata i caja cáhnu i ndohó, cáchi Jesús.

¹³ Ta cáchi tucu a já:

Yehe cándéé ini i Ndióxi, tátá i.

Ta cáchi tucu a já xihin Ndióxi:

Yóho ín i xihín ndihi jahyi ndó, na nasahan mé ndó nuú i cacomí i cuénta saha, cáchi Jesús.

¹⁴ Sahá ña ín yiquí cuñu ñayivi, na cúu jahyi Ndióxi sahá ña cán quéa nanduu Jesús in ñayivi ta nasahin yiquí cuñu a tá tuhun mí. Ta tá naxihi yiquí cuñu a já nacandéé a nasahnu a nuú tiñáhá sacuha, rí cája ña xihí ñayivi.

15 Ta xihín ña yóho najácacu a tócó ndihi na nasayihví quivi jáchi níí tiempo nasanduu na ndáha tiñáhá sacuaha sahá ña yíhvi na.

16 Jáchi mé a ndaa coó naquixi Jesucristo ña ná chindeé a na cúú táto Ndióxi. Ña naquixi mé á caja queá chindeé a ñayivi, na cándeé ini Ndióxi tá quiahva nacandeé ini Abraham Ndióxi.

17 Ña cán queá naxini ñúhú Jesús nduu a in ñayivi cácu ñuyíví yóho tátuhun mí. Ta xihín ña nandoho a naxinu a nanduu a in jutu sacuaha nu Ndióxi indiví. Ta naxihí a ndica crúxu sahá cuachí jáchi cája ndaa mé á tócó ndihi ñaha ta táhvi ini a saha yo. Ta xihín ña yóho nacaja cáhnu ini a sahá cuachí.

18 Ta sahá ña nandoho ini mé á ta sahá ña naxito ndojó rí quini mé á sahá ña cán queá xíni a ndá quiahva ndóho ini. Ña cán queá cuu chindeé a ndaja táhan na ndóho ini, na xíto ndojó tiñáhá sacuaha.

3

Cáhnu chága Jesús a juú ga Moisés

1 Candehé ndo, ñani i, na cúú cuéntá Jesús. Mé ndó cúú ndó na nacaxi Ndióxi cacomí a cuéntá saha. Candehé ndó Jesucristo, mé á cúú á tátuhun apóstol, ña nachindahá Ndióxi cacuu jutu sacuaha saha yo nu Ndióxi sahá ña cándeé ini mé á.

2 Ta xihín ndinuhu ini a nacaja chúun a cuéntá Ndióxi, mé a nacaxi ñahá. Jáchi tá quiahva nacaja Moisés tócó ndihi ña cúni Ndióxi tañu na cúú cuéntá mé á quiahva já nacaja Jesús tócó ndihi ña cúni Ndióxi, tátá a.

³ Joo ndítahan ndicáhnu chága Jesús a juú ga Moisés jáchi cáhnu chága Jesús a juú ga Moisés. Cúú á tátuhun tá cávaha in daṭaa in vehe ta ndítahan ndicáhnu chága mé dá a juú ga vehe da.

⁴ Ndúsa coo in da cávaha vehe já cuu cavaha ña joo tóco ndihi ñaha ín a jáchi nacavaha Ndióxi ña.

⁵ Ña cán quea nacaja chúun Moisés cuénta Ndióxi xihín ndinuhu ini da tañu ñayivi mé á. Ta chuun nacaja da quea cáxi tūhun jini da xihín ná ña cuni Ndióxi cahan xihín ná chága chí nuu.

⁶ Joo jín va chuun nacaja Jesús, mé á cúú in tūhún jini já jahyi Ndióxi jáchi cómi a cuénta sahá na cúú cuénta mé á xihín ndinuhu ini a. Cuénta mé á cúú mí tá ndacu coo ínima yó ta tá ná candeé ini mé á. Ta xini ñuhú cajii ini candatí anda quixi mé á.

Cúni Ndióxi ña ná ndihvi na cúú cuénta mé á nuú ndiquehe ndéé ná

⁷ Candehe ndó ndá quiahva cáchi ínima yii Ndióxi ini tūhun mé á tá cáchi a já:

Tá ná cuni johó ndó ña cahan Ndióxi xihín ndó quivi víti,

⁸ a cája sáa ini ndó xihín á tá quiahva nacaja na Israel tá naxica nuu na yucú íchí cán.

Jáchi nandiñehe yúhu ná nu Ndióxi ta ihvi ndivaha nasacuu ini na xihín Ndióxi.

⁹ Ta já cáchi Ndióxi já:

“Mé yucú íchí jan naxito ndojó tásáhnu jícó ndó yehe,

vatí naxini na ña náhnu ndivaha nacaja i tixi ivi jíco cuia.

10 Sahá ña cán quéa naxojo ini i xihin tóco ndihi na cán,

ta ñacachi i saha ná ña cúu ná ña cáhvi ivi, joho ini, ta sáa ini na caca na íchi cuénta mí i.

11 Sahá ña cán quéa naxojo ini i xihin ná, ta ñasahan i tuhun i ña a quiahva toho i ñamaní nu ná

ndihvi na nuú ndiquehe ndée ña xihín i”, ñacachi Ndióxi xihín ña Israel.

12 Ña cán quéa cuénta vaha coo ndó, ñani i já ná a cáñehe ndó ínimá quini ña jácaxoo ndó nu Ndióxi, ña tácu, sahá ña co cúni ndó candúsa ndó mé á.

13 Ña ndítahan caja ndó quéa quiahva tuhun ndee ini táhan ndó nini quivi. Ta a quiahva ndó ñamaní yaha quivi víti tá núná nu ndó caja ndó ña cúni Ndióxi. Jáchi co cúni a ña ná jándahvi ña núu ñuyívi yóho ndohó ta já ná ndisáa ini ndó nu Ndióxi.

14 Jáchi tá ná candeé ndusa iní mé á janda quiahva ná xinu quivi nu ndihí cuíí tá quiahva ñacaja í janda saha já quéa cúni cachi a ña in ñanduú xihin Jesucristo.

15 Jáchi quiahva já cáchí tuhun Ndióxi:
Tá xini joho ndó ña cáhan Ndióxi xihin ndo quivi víti,

a cája sáa ini ndó xihin á tá quiahva ñacaja ña Israel tá ñandiñehe yúhu ná nu Ndióxi yucú íchí cán, cáchí a.

16 Jáchi sa xini ndó ndá ña ñandiñehe yúhu nu Ndióxi tá naxini joho na ña ñasahnda mé á nu ná. Ña cán cúu ña tóco ndihi ña ñasandaca Moisés tá ñaqueta na nación Egipto.

17 Ta xih̄in mé n̄a cán naxojo ini Ndióxi tixi ivi jíco cuia jáchi n̄acaja na cuachi nū mé á ta sahá ña cán queá n̄acuyu na naxih̄i n̄a yucú íchí cán.

18 Ta sahá ña coó naxeen na caja na ña cúni Ndióxi sahá ña cán queá n̄asahan Ndióxi t̄uhun a ña a quiahva toho a ñaman̄i nū ná canduu na nuú ndiquehe ndée n̄a xih̄in á.

19 Ta mé a ndaa cándaa iní ña coó n̄acuu ndihvi na nuú n̄asacu ini Ndióxi coo na sahá ña co naxeen na candúsa na mé á.

4

1 Sahá ña cán queá viti sáhan yij̄i va Ndióxi ñaman̄i nū yó yaha í nuú n̄asacu ini mé á ndiquehe ndée yo xih̄in á. Joo xíní ñúhú cuénta vaha coo ndó jáchi tiahva náa a xínu coo java ndó ndihvi ndó cán.

2 Jáchi tá quiahva n̄axini joh̄o n̄a Israel t̄uhun Ndióxi quiahva já n̄axini joh̄o í t̄uhun mé á, ña cáchí a cúni jácaacu Ndióxi ñayivi. Joo coó n̄acandúsa n̄a cán ña sahá ña cán queá coó chuun a nū ná.

3 Joo mí cúú yó n̄a cándeé ini Ndióxi ta sahá ña yóho tandaa quiv̄i xinu coo í ndihvi nuú ndiquehe ndée yó xih̄in á. Ta já cáchí Ndióxi já sahá ña yóho: Naxojo ini i xih̄in n̄a co cándúsa yehe, sahá ña cán queá n̄asahan i t̄uhun i ña ná a ndihvi toho na nuú n̄asacu ini i ndiquehe ndée ná xih̄in i, cáchí a.

N̄acachi Ndióxi ña yóho vatí sa n̄acaja tiahva mé á nuú ndihvi na ndiquehe ndée n̄a anda tá n̄acava sáhá saha ñuyíví.

4 Ndáa ini t̄uhun Ndióxi ña n̄acaja mé á quiv̄i usa. Já cáchí a já:

Quiví usa nandiquehe ndée Ndióxi nuú chuun naçaja tá naçavaha tóco ndihi ñaha, cáchí tuhun Ndióxi.

⁵ Ta já cáchí tucu a já sahá na co cándusa Ndióxi:
A ndihvi toho na canduu na nuú ndiquehe ndée ná xihín i, naçachi a.

⁶ Ta coó nandihvi toho na naçahan Ndióxi xihin nu cuítí cán jáchi coó naxeen na candúsa na mé á. Joo núná yii va nuú java ñayivi ndihvi na ndiquehe ndée ná xihin mé á.

⁷ Jáchi naçacu Ndióxi inga quivi ta cúu á quivi víti ta já cuu ndihvi ñayivi ndiquehe ndée na xihin mé á. Sanahá ndivaha naçahan Ndióxi xihin rey David sahá ña yóho ta naçahyí da ña ta já cáchí a já:

Tá xini joho ndó ña cáhan Ndióxi xihin ndó quivi víti a cája sáa ini ndó xihin á, cáchí tuhun Ndióxi.

⁸ Ta sa xini yo ña coó najándihvi Josué ñayivi nu ndiquehe ndée na xihin Ndióxi jáchi naçahan Ndióxi sahá inga quivi vaxi chága chinuu.

⁹ Sahá ña cán quea sa xini yo ña camaní xinu coo quivi ndiquehe ndée na cúu cuéntá mé á tá quiahva nandiquehe ndée mé á quivi usa.

¹⁰ Jáchi ndá na ná ndihvi ndiquehe ndée nu ín mé á cán já quea ndiquehe ndée ná nuú chuun naçaja na tá quiahva nandiquehe ndée Ndióxi nuú chuun naçaja mé á.

¹¹ Sahá ña cán quea ndítahan ndihi ini ndihvi nuú ndiquehe ndée yo cán. Ta ná a cája í tá quiahva naçaja na Israel cán tá coó naxeen na candúsa na nuú naçahan mé á xihin ná.

¹² Ín cuaha ndée tuhun Ndióxi ta cúu á tátuhun ña tácú. Ta ín chága ndée tuhun Ndióxi a juú ga in

yúchu ña ivi yúhu. Ta tá quiahva quíhvi yúchu ña ivi yúhu tá sáhndá yiquí cuñu quiahva já quíhvi tuhun Ndióxi janda maá ini ínima ñayivi xihín xíní túní ná ta já xínu a ini na. Ta náha ndá quiahva cáhvi ini na.

¹³ Jáchi xíní Ndióxi tóco ndihi ñaha ta a cuú chijehé yo ña cáhvi iní jáchi sándehe mé á tóco ndihi ñaha nacavaha mé á. Ta vaxi quivi nahma yo nu mé á tóco ndihi ña nacaja í.

Jesús cúú á jutú sacuaḥa nuú ndihí indiví

¹⁴ Mé Jesús cúú á jutú sacuaḥa nuú ndihí sahá ña cán quéa co ndítahan jándacoo í ña cándéé iní Jesús, mé a cuú in túhún jiní já jahyi Ndióxi. Ta nandihvi a indiví nu ín Ndióxi.

¹⁵ Ta cándáhví iní Jesús mí jáchi cúú á jutú sacuaḥa nu yo ta cándaḥa ini a ña cuú yó ñayivi vitá ndivaha ini. Jáchi tá naxica nuu a ñuyíví yóho naxito ndojó tiñáhá sacuaḥa mé á xihín tá nuú ñaha tá quiahva cája rí xihín mí joo ni in túhún cuachi coo nacaja mé á.

¹⁶ Ña cán quéa a cáyihví toho í cayatí nu ín coo Ndióxi, mé a quíhvi ini a mí jáchi táhvi ini a saḥa yo ta chindeé a mí tá ná caça i ñamaní nu á.

5

¹ Tóco ndihi da cúú jutú sacuaḥa chága nu ndihí jutú cúú dá da sá caxi na tañu ñayivi Israel já ná caḥan cuachí da sahá ñayivi nu Ndióxi. Ta jári jóco da ñaha nu Ndióxi ta sáhní da quítí nu ná saḥa cuachi na.

² Ta sahá ña cúú dá da vitá ini, da ñuyíví yóho sahá ña cán quéa cuu cándáhví ini da ñayivi, na co

xíní ña sáhdá Ndióxi. Ta cuu candáhví ini da na cája cuachi.

³ Ta sahá ña vitá ini da sahá ña cán quéa ndítahan cahní da quítí joco da rí nu Ndióxi sahá cuachi mé dá xihín sahá cuachi ñayivi viti.

⁴ Ta ni in da cán a cúu chinúu da mé dá cacuu da jutú sacuahá chága nu ndíhi jutú. Jáchí xíní ñuhú cacuu da da nacana Ndióxi caja chúun cuéntá mé á tá quiahva nacaja Ndióxi sanahá tá nacana mé á Aarón ña ná caja chúun da cuéntá mé á.

⁵ Quiahva já nayaha xihín Jesucristo jáchí coó nachinúu a mé á ña ná nduu a jutú sacuahá. Ndióxi quéa nachinúu ñahá tá nandaja cáhnu a Jesús. Ta já nacachi Ndióxi já xihín á:

Jahyi yehé cúú yóhó,

ta viti cáchí i ña nanduu u tátún, cáchí a.

⁶ Ta inga nu cáhan tuhun Ndióxi já cáchí a já:

Anda ama cáa quivi cacuún jutú,

ta cajún tá quiahva nacaja in jutú, da nasananí Melquisedec sanahá, cáchí a.

⁷ Nani nasahiin Jesucristo ñuyívi yóho a juú quiahva naxica tahví a nu Ndióxi. Ta java tañu nasacu a ta java tañu nacayuhú a nu Ndióxi, mé a cúú chindeé ñahá ña ná a quívi toho a. Ta sahá ña nasacaja Jesús tóco ndihi ña sáhdá Ndióxi, tátá a sahá ña cán quéa naxini johó Ndióxi nu cáhan mé á.

⁸ Ta vatí cúú Jesucristo in tuhún jini já jahyi Ndióxi joo xihín ña nandoho ini a ñuyívi yóho nacatiahva coo johó a nu cáhan Ndióxi, tátá a xihín á.

⁹ Ta xihín ña yóho najáxinu coo mé á nacaja tóco ndihi ña natahnda nu á caja. Janda jáví nacuu

jáçacu a mí ña ná coo í xihín mé á anda ama cáa quívi tá ná caja í ña sáhdá mé á.

¹⁰ Ta nandicojo a chuun ñajaja Ndióxi ña ná nduu a jutú sacuaḥa tátuhun mé jutú, da ñasananí Melquisedec.

Cuénta coo ndó ná a jándacoo ndó ña cándeé ini ndó Jesús

¹¹ Ín cuahá ndivaha ñaha cúni ndicani i nu ndo sahá ña yóho joo yáncá ndivaha ndicani i ña nu ndo jáchi cō cúni ndo taa johó ndó nu cáhan i.

¹² Anda jihna nandihvi ndó íchi cuénta Jesús ta viti sa ndítahan nu ndó jánaḥa ndó tuhun Ndióxi nuú ñayivi. Joo cō cája ndó já jáchi ñacavitá ndo ta tucu tucu jácuaha ndó ña cō íhvi toho. Ta viti cúu á tátuhun cō ndeé ini ndó cuxu ndó ña xíxi ñayivi náhnu joo ña cája ndó quéa xíhi yii va ndó leche tátuhun na valí va.

¹³ Ta tá quiahva xíhi na valí leche quiahva já cája ri na cō tiáhva ndícuni ndía cúu ña vaha ta ndía cúu ña núu.

¹⁴ Joo ñayivi, na cándaḥa vaha ini tuhun Ndióxi cúu ná tátuhun ñayivi náhnu, na tácu ini, na xíxi cuñu va jáchi sá tiáhva na ndícuni na ndía cúu ña vaha ta ndía cúu ña núu.

6

¹ Sahá ña cán quéa ña ndítahan caja í quéa ndindacú chága yo xihín ñaha Ndióxi janda quiahva ná xinu cōo í cacúu ñayivi tácu ini xihín ñaha Ndióxi. Cō ndítahan jácuaha tucú ña najácuaha í tá jacá nandihvi íchi cuénta Jesús jáchi ndítahan catiahva í ña jan. Ndítahan cándaḥa ini ña çacu ndaa ínima yo

sahá ña cándéé iní Jesucristo cuití va ta cō cúú á sahá ña cája í ña vaha.

² Ta sa cándaā iní ña ndítahan candúta na cúú cuéntá Jesús. Ta sa cándaā iní ndaja cája í chinúu ndáha yó jiní ñayivi tá xíca tahví yó nu Ndióxi saha ná. Ta sa cándaā iní ña vaxi quivi nditacu tucu tóco ndihi ndii ña ná caja vií Ndióxi saha ná.

³ Sahá ña cán quéa cáchí i xihín ndó: Coho ndindacú chága yó xihín ñaha Ndióxi, tá ná quiahva Ndióxi ñamaní nu yo.

⁴ Ta a cúú ga ndicó cōo ñayivi nu Ndióxi tá sa najándacoo na ña nasandéé ini na mé á. Jáchí sa najándiyéhe Ndióxi ínima ná ña ná candaā ini na saha mé á ta sa xini na ndá quiahva ín ñaha Ndióxi. Ta janda ínima yii Ndióxi sa nandacaan ínima ná.

⁵ Ta sa nacandaā ini na tuhun vaha cáhan sahá Jesucristo ta sa nacandaā ini na ndá quiahva náhnu caja Ndióxi chága chí nuu.

⁶ Joo tá ná jándacoo na jan ña cándéé ini na Ndióxi já quéa a cúú ga ndicó cōo na nu mé á jáchí xihín ña cája na cúú á tátuhun cata caa tucu na Jesucristo, jahyi Ndióxi ndica crúxu ta já sácū ndaa na mé á nuú ñayivi.

⁷ Jáchí sa xini ndo ndaja ín ñundáhyi nu cúun vaha javi ta ndíndahyi a. Ta tá ná cana cuahá ñaha nuú naxutu ñayivi cán já quéa cúni cachi a ña cája Ndióxi ñamaní xihín ñundáhyi cán.

⁸ Joo tá ná nana tohíñú xihín toçihmá nu ñúhu cán já quéa cōo saha toho a ta ña yóho cúni cachi a ña cō cája toho Ndióxi ñamaní xihín á ta vaxi quivi cayi a caja Ndióxi.

Vaxi quivi coo í xihín Ndióxi tá cō jándacoo í íchi

cuéntá mé á

⁹ Candehé ndó, ñani mañi i, na cúu cuéntá Jesús. Vatí cáhan nde ña yóho xihín ndo joo cándée ini nde ndohó ña cája tá cája ndó ña vaha ña ndítahan caja na cándée ini Jesús.

¹⁰ Ta xíni nde ña cája Ndióxi ña ndaa cuití va ta a ndíndójó toho mé á sahá ña vaha nacaja ndó tá nachindeé ndó na cúu cuéntá Jesús jáchi xihín ña yóho náha ña quíhvi ini ndusa ndó mé á. Ta mé a ndaa janda viti chindeé ndó na cán.

¹¹ Ta a juú quiahva cúni nde ña ná ndihi ini in in ndó chindeé ndo na cúu cuéntá Jesús anda quivi nu ndíhí. Ta xihín ña yóho vaxi quivi tá quiahva Ndióxi nu ndo tóco ndihi ña ndáti ndó quiahva mé á nu ndo.

¹² Co cúni nde ña ná cajúsá ndo caca ndó íchi cuéntá Jesús. Ña cúni nde quea ná ndihi ini ndó caja ndó tá quiahva cája na cándée ini Ndióxi, na coó najándacoo ña cándée ini na mé á ta xihín ña yóho ñehé táhvi ná ña nasahan Ndióxi tuhun a quiahva nu ná.

¹³ Tá nasahan Ndióxi tuhun a nu Abraham sanahá já natavá a quivi mé á tátuhun testigo jáchi coó inga ga ña cáhnu chága a juú ga mé á.

¹⁴ Ta tá nasahan mé á tuhun a nu dá já nacachi a já xihín dá: “Mé a ndaa caja cuahá i ñamaní xuhun ta caja i ña ná ndicuahá ndivaha na quixi chíchún.” Já nacachi Ndióxi xihín Abraham tá nasahan tuhun a nu dá.

¹⁵ Ta coó nandihí ini Abraham nani nasandati da jáxinu coo Ndióxi tuhun a ta chí nañehé dá ña nasahan Ndióxi tuhun a quiahva nu dá.

16 Tá sáhan ñayivi tuhun na nuú inga ñayivi já tává na quivi in na cáhnu chága a juú ga mé ná ña ná cacuu na testigo. Jáchi cája ndúsa in testigo xihin ná jáxinu coo na ña nasahan na tuhun na caja na.

17 Sahá ña cán quéa natavá Ndióxi quivi mé á jáchi cúni a jánaha cáxi a nuú ñayivi ña a ndijama toho a tuhun nasahan nu ná ta ndúsa jáxinu coo a tuhun a nuú na ñéhe táhvi ndiquehe a.

18 Ta cándaá iní ña nasahan Ndióxi tuhun a nu yó ta natavá a quivi á cacuu a testigo ta xihin ndívi ña yóho sa xini ví ña a cuú ndijama Ndióxi ta ni a cuú cahan mé á ña tuhún. Ta xihin ña yóho sáhan mé á tuhun ndeé iní jáchi cándeé iní mé á ta sa nandiquiahva í mí ndáha mé á ña ná jácacu a mí.

19 Sahá ña cán quéa cátivi tuun í xihin Ndióxi ta cándeé iní ña quiahva mé á nu yo ña sáhan tuhun a quiahva nu yo. Ta sahá ña cándeé cáhnu iní mé á sahá ña cán quéa co yíhvi toho í cayatí nu mé á jáchi sa nandihvi Jesús nuú yii ndivaha indiví.

20 Ta cúni Jesús chindeé a mí ña ná xinu coo í nu ín a cán sahá ña cán quéa nandihvi jihna ñúhú ga cán a juú ga mí. Ta cuu caja Jesús ña yóho jáchi nandu a jutú sacuahá nu Ndióxi ta anda ama cáa quivi cája mé á chuun yóho tá quiahva nacaja da naní Melquisedec sanahá ndivaha.

7

Chuun nacaja Melquisedec sanahá

1 Mé Melquisedec yóho nasacuu da rey nuú ñayivi ñuu Salem ta nasacuu da jutú nu Ndióxi, mé á cúu ña cáhnu chága a juú ga inga ga. In tañu tá

nāndicó coo Abraham nāsahan da nācani táhan da xihín java rey ta najándihi da sahá nā cán já naqueta Melquisedec íchi nuú vaxi Abraham ta já nācaja yji dá Abraham.

² Ta mé Abraham nāndaja da uxu táhndá tóco ndihi ña nācandaa da ndáha java rey tá naquee vaha da xihín nā cán. Ta já nāsahan da in táhndá nuú Melquisedec. Ta quiví Melquisedec yóho cúni cachi a rey, da cája ña ndaa. Ta sahá ña cómi da cuénta sahá ñuu Salem, ña cúni cachi a nuú ín vaha ini ñayivi sahá ña cán quéa cúú dá rey, da cája ña ná coo vaha ini ñayivi.

³ Ta ni in ñayivi co xini nā saha tátá náná mé Melquisedec yóho ta co ndaa nuú tutu quivi tásáhnū jícó da. Ta co xini nā ndá tañu nācacu da ta ni co xini nā ndá tañu naxihí da. Joo ña xini nā quéa cúú dá jutū anda ama cáa quivi tá quiahva cúú Jesucristo jutū anda ama cáa quivi, mé a cúú in túhún jini já jahyi Ndióxi.

⁴ Ta viti cuu candehé ndó ndaja cáhnū nāsacuu Melquisedec jáchi janda mé Abraham, da nāsacuu tásáhnū jícó yo nāsahan da nuú Melquisedec in táhndá nuú uxu táhndá ñaha ña nācandaa da ndáha rey, da naquee vaha da xihín cán.

⁵ Ta sa xini ndo ña cáchí ley Moisés ña ín saha nuú jutū, nā naquixi chichi Leví ndiquehe na in táhndá nuú uxu táhndá ña cómi nā Israel. Jáchi mé jutū cán cája chúun na nu Ndióxi cuéntá táhan na nā Israel vatí in cúú tóco ndihi na sahá ña naquixi ndihi na chichi Abraham.

⁶ Vatí coo naquixi Melquisedec yóho chichi Leví joo naqueehe tá naqueehe da in táhndá nuú uxu táhndá ñaha nu Abraham, da nāsahan Ndióxi

tuhun a nuu ña caja cuahá ñamaní xihin. Tá ñajaja yii Melquisedec Abraham

⁷ náha ña mé a ndaa cáhnu chága da caja yii ñayivi a juú ga na ñacayii cán. Ta ni in na a cuú cachi na ña co cúu ña yóho ña ndaa.

⁸ Ta sa xini yo ña cáhnu chága Melquisedec a juú ga jutú, na ñaquixi chichi Leví, na quéhe in táhndá nuú uxu ñaha jáchi cúu ná ñayivi, na ndíhi saha. Joo cáhan tuhun Ndióxi sahá Melquisedec tátuhun tácu yii va da.

⁹ Ta náha ña cáhnu chága Melquisedec a juú ga Leví, da cúu tásáhnu jícó tóco ndihi jutú, na quéhe in táhndá nuú uxu a cán. Jáchi cúu á tátuhun nachahvi Leví in táhndá nuú uxu a tá nachahvi Abraham ña nu Melquisedec.

¹⁰ Jáchi tá ñaquehe Melquisedec in táhndá nuú uxu ñaha nu Abraham, cúu á tátuhun nasañehe Abraham tóco ndihi na vaxi chichi da ini yiquí cuñu da jáchi cámaní yí cacu na mé tiempo já.

¹¹ Ta tóco ndihi jutú, na ñaquixi chichi Aarón, ñaquixi na chichi Leví viti. Ta vatí ñajaja na chuun Ndióxi ña jáyaha na ley Moisés nuú ñayivi joo a cuú nduu ndaa ñayivi nu Ndióxi xihin mé ley. Sahá ña cán quéa ñachindahá Ndióxi Jesucristo ñuyívi yóho já ná cacuu a inga jutú, ña ná caja tá quiahva ñajaja Melquisedec sanahá. Ta coó ñajaja mé á tá quiahva ñajaja Aarón, da nasacuu tásáhnu jícó jutú cán.

¹² Ta tá ñachindahá Ndióxi in jutú saá xini ñuhú a ndijama ri a ley va.

¹³ Ta mé jutú saá cúu Jesucristo, xitoho í, mé a cáhan tuhun Ndióxi saha. Ta coó ñaquixi Jesucristo chichi Leví ta ni coó ñaquixi a chichi Aarón.

Jíin va chichi naquixi a ta ni in da taa naquixi chichi cán a ñáha cacuu da jutü.

14 Joo cándaá vaha ini ñayivi ña naquixi Jesucristo chichi Judá ta co cúú á chichi nu sá cana jutü ta ni coó naçahan Moisés sahá na quíxi chichi Judá tá naçahan da sahá na cacuu jutü.

15 Ta cándaá vaha chága ini ña yóho jáchi sa xíni yo ña mé jutü saá ña cúú Jesucristo nandiquehe a chuun tátuhun naçaja Melquisedec sanahá.

16 Ta coó nanduu a jutü sahá ña naçacu a chichi Leví nu sá cacu jutü. Joo nanduu a jutü sahá ña cúú cája tóco ndihi ñaha ta sahá ña tácu a anda ama cáa quívi.

17 Jáchi tá cáhan Ndióxi saha Jesucristo já cáchi a já:

Yóho cúún jutü anda ama cáa quívi,
tátuhun mé jutü, da nasananí Melquisedec jáchi
cájún chuun tá quiahva naçaja mé dá, cáchi
tuhun Ndióxi.

18 Sahá ña cán queá naçandoo xóo ley Moisés jáchi coó chuun a ta a cuú chindeé a ñayivi.

19 Ta ni coó naçuu caja mé ley Moisés ña ná nduu ndaa ñayivi nu Ndióxi. Joo viti cáji iní jáchi xihín ña naçaja Jesucristo já cuu nduu ndaa yó nu Ndióxi ta já cuu cayatí nu mé á.

20 Ta tá naçaja Ndióxi ña nanduu Jesucristo jutü já naçahan tuhun a ta nasacu a mé á cúú á testigo sahá.

21 Joo tá nanduu na naquixi chichi Leví cán jutü coó naçahan Ndióxi tuhun a saha ná tá quiahva naçaja xihín Jesucristo tá nanduu a jutü. Ta já naçachi Ndióxi ini tuhun mé á:

Yehe cúú Ndióxi ta nasahan i tuhun i nu yóhó ta a ndíjama toho i tuhun cáhan i:

“Nachinúu i yohó cacuún jutú anda ama cáa quivi. Ta cajún chuun tá quiahva nacaja Melquisedec sanahá”, cáchí Ndióxi.

²² Sahá ña nandicojo Jesucristo chuun nasahan Ndióxi nu á sahá ña cán quéa cándéé iní ña jáxinu coo Ndióxi tuhun nasahan nu yo. Ta vaha chága ña yóho a juú ga ley Moisés.

²³ Ta ndaja coo nasanduu cuahá jutú, na naquixi chichi Leví cán jáchi naxihi ndihi na ta nacandoo chuun na nuú inga na.

²⁴ Joo tácu Jesucristo anda ama cáa quivi ña cán quéa a jándacoo toho a chuun a nuú inga ga.

²⁵ Ña cán quéa anda ama cáa quivi ín tiahva Jesucristo jácaacu a mí tá ná cayatí nu Ndióxi sahá ña nacaja Jesucristo tá naxihi a ndica crúxu. Ta ín mé á nu Ndióxi xíca tahví a nu mé á sahá na cándéé iní mé á.

²⁶ Mé a ndaa xíní ñúhú yo Jesucristo ña ná cacuu a jutú sacuahá nu Ndióxi saha yo. Jáchi mé á cúú á ña yíi ndivaha ta ni in cuachi coo nacaja mé á ta ni in cuachi a cúu chícaan yó jatá. Ta co xíca nuu ga mé á tañu na cája cuachi jáchi ín a indiví nu ndicáhnu ndivaha mé á.

²⁷ Co xíní ñúhú caja Jesucristo tá quiahva nacaja java ga jutú sacuahá, na naquixi chichi Leví. Jáchi nini quivi nasahní na cán quítí jóco na rí nu Ndióxi sahá cuachi ñayivi. Ta nu cuítí nacaja na ña sahá cuachi mé va na ta anda jáví nacaja na ña sahá cuachi ñayivi. Joo jíin va nacaja Jesucristo jáchi in túhún tañu cuítí va najoco a mé á tá naxihi a ndica crúxu sahá cuachi tóco ndihi ñayivi.

28 Tá nacaja na ña cáchi ley Moisés já nasacu na in dataa, da cája cuachi ña ná cacuu da jutu sacuha. Joo tá nandihi já nachinúu Ndióxi Jesucristo, jahyi a ña ná cacuu a jutu sacuha, ña cája ña nadaa anda ama caa quivi. Ta nasahan Ndióxi tuhun a nu yo ña jaxinu coo a tocó ndihi ña cáchi a.

8

Jesús cúu á jutu sacuha saha yo indiví

1 Nacachi nde ña yóho ña ná canda*a* ini ndó ña cúu Jesucristo jutu sacuha saha yo nu Ndióxi ta ín coo a xoo cuáha Ndióxi indiví nu ndícahnu ndivaha mé á.

2 Cúu á jutu sacuha cája ndíví a veñuhu indiví ña nacavaha Ndióxi ta co cúu á ña nacavaha ñayivi.

3 Ndítahan nu tocó ndihi na cúu jutu sacuha cahní na quíti nu Ndióxi ta joco na ñaha nu á. Ña can quéa ndítahan ri nu Jesucristo joco a ñaha nu Ndióxi.

4 Tá ná caca nuu Jesucristo ñuyíví yóho, nduu já quéa a cacuu toho a jutu, nduu. Jáchi sa nduu cuahá ndivaha jutu ñuyíví yóho ta joco na ñaha nu Ndióxi tá quiahva sahnda ley Moisés.

5 Joo ña cája mé ndihi jutu ñuyíví yóho cúu á tatuhun yuhú nuu ña cája Jesucristo indiví. Ta canda*a* iní ña cúu á tatuhun yuhú nuu ña ín indiví jachi sanahá ndivaha tá nasahnda Ndióxi chuun nu Moisés ña ná cavaha da veñuhu xihin ní quíti já nacachi Ndióxi já xihin da: “Cuéntá coun nadaja cavahún veñuhu xihin ní quíti jan. Jáchi xíni ñúhú coo a tá quiahva caa ña nanaha i nuún jini yúcu can”, nacachi Ndióxi xihin Moisés.

⁶ Joo Jesucristo, mé á cúú jutú sacuaḥa saḥa yo indiví nandicojo a in chuun ña vaḥa chága a juú ga chuun cája jutú ñuyíví. Vaḥa chága ña naḥaja Jesucristo a juú ga ley Moisés jáchi jándique táhan máni a mí xihín Ndióxi ta xihín ña yóho xínu cōo tuhun naṣaḥan Ndióxi nu yó jihna.

⁷ Tá ná cuu caja ley Moisés ña jácaacu a mí ná a cúhun toho í indayá, nduu já quéa cō xíní ñúhú quiwi Jesucristo jándique táhan máni a mí xihín Ndióxi, nduu.

⁸ Joo xíní vaḥa Ndióxi ña mé ley Moisés a cuú jácaacu a ñayivi saḥá ña cán quéa já naḥachi a já: Vaxi quiwi tá quiahva i tuhun saá nuú ñayivi Israel ta nuú na naquixi chichi Judá.

⁹ Jín va cúú tuhun saá quiahva i nu ná, jáchi cō cúú toho a tuhun naṣaḥan i nu táśáhnú jícó na saḥaḥá ndivaha, tá naṭiin ndahá i na ta naṭavá i na nuú naṣanduu na nación Egipto.

Ta saḥá ña cōó najáxinu cōo na tóco ndihi ña naṣahnda i nu ná caja na saḥá ña cán quéa najándacoo i na.

¹⁰ Ta vaxi quiwi tá quiahva i tuhun saá nuú ñayivi Israel.

Ta caja i ña ná candaḥa vaḥa ini na ley mí i ta cañuhu a ini ínima ná ña ná caja na ña cúni mí i.

Ta yeḥe cacuu Ndióxi caja cáhnu na, ta mé na cán cacuu ñayivi cacomí i cuénta saḥa.

¹¹ Ta a cúni ñúhú ga na jánaḥa ñani táhan mé ná ña ná candaḥa ini na saḥa Ndióxi, jáchi tóco ndihi ñayivi anda na valí anda na sáhnú candaḥa ini na yo cúú yeḥe.

12 Ta caja cáhnu ini i saha ndaja táhan ña núu ñacaja na,
 ta a ndícuhun ga ini i sahá cuachi na, cáchí Ndióxi.
 13 Tá ñacahan Ndióxi sahá tuhun saá ña quiahva mé á nuú ñayivi já quéa náha ña coó chuun ga mé tuhun ñasahan nu ná jihna ta cama chá ndihi sahá.

9

Veñuhu ñuyívi xihín veñuhu indiví

1 Tá ñasahan Ndióxi tuhun a nuú na Israel sanahá ndivaha já ñasahnda chuun sahá ndaja caja cáhnu na mé á ini veñuhu ña cávaha na ñuyívi yóho.

2 Ta ndácaan ivi cuarto ini mé veñuhu cán. Ta ña ndácaan ini cuarto nu cuítí cúu in candelero xihín in mesa nu cándójó pan yii. Ta mé cuarto nu cuítí yóho naní a in nuú yii.

3 Ta íin in jahmá ndeé ña ndájí nuu táhan tañu ndíví cuarto yóho. Ta cuarto ndácaan maá naní a nuú yii ndivaha.

4 Ta mé cán íin in nu náa ña ñacavaha xihín jiuhun cuáán nu chíníhmá jutu jusa vaha. Ta jári cán íin sató arca ñaha Ndióxi ta tóco ndihi jata mé sató arca ñandicuchu xihín jiuhun cuáán. Ta chí ini sató cán ndácaan in tindojo jiuhun cuáán nu ñúhu maná ña ñaxixi na Israel tá ñaxica nuu na yucú íchí cán. Ta jári ndácaan mé yító ñaha Aarón, dó ñasaa núma sanahá. Ta chí ini arca cán ndácaan ri ivi yuu jáhnda nu ndáa ley ñasahan Ndióxi nuú Moisés.

5 Ta jiní mé sató arca cán ndíndójó ña cúu yuhú nuu tátó Ndióxi naní a querubines. Cándójó a cán

ñā ná ndicuhun ini ñayivi ñā ín Ndióxi cán cája cáhnu ini a sahá cuachi na. Ta mé tátō Ndióxi cán ndícaā ndixi a cándójó a jata arca. Joo a cúu ndicani chága yo sahá ñā yóho viti.

⁶ Já nasahin tiahva tóco ndihi ñaha veñuhu. Ta ndijáá níi quivi nandihvi jutū cuarto nū cuítí cán cája ndíví nā ñaha caja cáhnu na Ndióxi.

⁷ Joo in tañu tá nū cuía in túhún da cúu jutū sacuahā naquihvi da cuarto maá cán. Ta ñéhe da níi quítí ñā joco da nū Ndióxi sahá cuachi mé dá xihín sahá cuachi ñayivi.

⁸ Ta xihín ñā yóho jánaħa ínima yii Ndióxi nū yo ñā a cuú ndihvi ndá ñayivi nacuu cuarto maá nuú yii ndivaha jáchi sa ín va cuarto nū cuítí.

⁹ Ta tóco ndihi ñā yóho cúu á tátuhun yuhú nuú nuú ñā ín tiempo viti. Ta sa xini yo ñā a cuú ndaja víi ñayivi ínima ná xihín ñā joco nā nū Ndióxi tá sáhní nā quítí ñā quiahva na níi rí nū mé á.

¹⁰ Jáchi tóco ndihi ñā nacaja nā cán nasacuu a cuéntá ñā sáxí nā xihín ñā xíhi na ta nasacuu a cuéntá ndaja nandaja víi nā mé ná xihín ticuú. Joo já nanditahan cája na janda quiahva tandaa quivi ndijama Ndióxi tóco ndihi ñaha jáchi a cúu ndaja víi nā ínima ná xihín ñā yóho.

¹¹ Ta ndaja coo naquixi Jesucristo ñuyíví yóho ta nanduu a jutū, da sacuahā chága nū yo. Naquixi a ñā ná quiahva mé á ñā vaha Ndióxi nū yo. Joo viti ín a indiví cája chúun a tátuhun jutū veñuhu ñā vaha chága cán. Cúu á veñuhu ñā coó nacavaha ñayivi ta co cúu á ñaha ñuyíví.

¹² In tañu cuití va nandihvi a nuú yii ndivaha ta coó nasañehe a níi tijúhu ni níi chélo ñā joco a nū

Ndióxi. Nii mé á cúú dó naxita ndica crúxu saha yo ña ná cacu ndaa ínima yo anda ama cáa quivi.

¹³ Jihna nacaja ñayivi ña nacachi ley Moisés ta nu yiquí cuñu na naxihnu ndaa jutú nii tindiquí á nii tijúhu ta naxihnu ndaa ri da na xihín yaa chélo, rí nasahmi na nu náa. Ta xihín ña yóho nandivií yiquí cuñu na nu Ndióxi.

¹⁴ Joo ndiyahvi chága nii Jesucristo a juú ga nii quíti. Jáchi tá naxihí Jesucristo já nandivií ínima yo já ná a cája ga yo ña co ndiyahvi cán ta ná caja í tóco ndihí ña cúní Ndióxi. Nacaja ínima yíi Ndióxi, mé a tácu a anda ama cáa quivi ña ná ndiquiahva Jesucristo mé á ndáha Ndióxi já naxihí a ndica crúxu saha cuachi vatí coó toho cuachi mé á.

¹⁵ Ta sahá tuhun saá nasahan Ndióxi nu yo sahá ña cán quéa cáhan Jesucristo xoo mí nu Ndióxi. Ta sahá ña nacaja Jesucristo tá naxihí a ndica crúxu cája cáhnu ini Ndióxi sahá cuachi nacaja í tá nasandico yó ley Moisés. Ta nandacaxi Ndióxi ñayivi, na cúní candúsa mé á já ná ndiquehe na ña vaha Ndióxi ña a ndíhi toho saha jáchi já cáa tuhun nasahan Ndióxi nu ná.

¹⁶ Cúú á tátuhun tá cávaha in dataa tutu cuénta ña ñehe táhvi ná candoo ñaha nu ná. Joo xíní ñúhú candaá ini na ña mé a ndaa naxihí da jándacoo ñaha cán anda jáví ndiyahvi mé tutu cán.

¹⁷ Jáchi nani tácu da co ndiyahvi toho tutu nacavaha da sahá ñaha ndicoo táhvi da. Janda quiahva ná quivi da já ndiyahvi a.

¹⁸ Ña cán quéa tá nu cuítí nasahan Ndióxi tuhun a nuú ñayivi nacaja mé á ña ná quivi quíti ta xihín nii rí cán nandoo cuachi ñayivi.

¹⁹ Jáchi tá nandihí nacahan Moisés ley nasahan

Ndióxi nuú ñayivi Israel já natiin da in yító, dó naní hisopo ta nacató da loho cachi cuáhá nu do. Ta nachindaxi da dó cán xihín nii chélo xihín ní tijúhu, dó nacava táhan xihín ticuí. Ta naxihnu ndaa da do nu libro nu ndáa ley Moisés. Ta naxihnu ndaa da dó nuú ñayivi Israel.

²⁰ Anda já nacachi da já xihín na Israel: “Xihín nii quítí yóho jáxinu coo Ndióxi tuhun a ña nasahnda nu ndó caja ndó”, nacachi Moisés.

²¹ Ta quiahva já naxihnu ndaa Moisés nii quítí nuú veñuhu ní quítí xihín nuú tóco ndihi ñaha ñúhu cán ña cája chúun na cája cáhnu na Ndióxi.

²² Jáchi cáchi ley Moisés ña xihín nii cuití va ndivií ndaja táhan ñaha, vatí a juú ndihi a. Ta janda quiahva ná cuita nii já cuu caja cáhnu ini Ndióxi sahá cuachi ñayivi.

Nandoo cuachí xihín nii Jesucristo

²³ Sahá ña cán quéa nanditahan nu Moisés ndaja ví da ñaha veñuhu ñuyíví yóho xihín nii quítí. Ta mé ñaha cán cúú á yuhú nuú ña ín indiví. Joo ñaha ín indiví ndivií a xihín nii, dó vaha chága a juú ga nii quítí.

²⁴ Ta veñuhu ñuyíví cúú á yuhú nuú cuití va ña ín indiví. Coó nandihvi Jesucristo nuú yí ndivaha veñuhu, ña nacavaha ñayivi. Joo nandihvi mé á indiví ta cán ín a viti ta cáhan mé á xoo mí nu Ndióxi.

²⁵ Jáchi da cúú jutú sacuha nandihvi da tá nu cuía nuú yí ndivaha veñuhu joco da nii quítí nu Ndióxi. Joo ña nacaja Jesucristo quéa nandiquiahva a mé á quivi a saha yo ta in tañu cuití va naxita nii á ndica crúxu.

26 Jáchí tá ná nditahan nuú Jesucristo quivi a cuahá tañu já queá janda mé saha tá nacava sáhá saha ñuyíví casáhá quivi a, nduu. Joo a juú a já jáchí tá jalóho cúni ndihi saha tiempo viti já nacasaa Jesucristo ñuyíví yóho ta in tañu cuití va naxihí a sahá cuachi ñayivi.

27 Quiahva já yáha xihín ñayivi jáchí in talaá tañu quivi na ta anda jáví ndítahan candichi na nu Ndióxi caja vií mé á sahá ña nacaja na tá nasanduu na ñuyíví yóho.

28 Ta quiahva já in tañu cuití va naxihí Jesucristo ndica crúxu jándoo a cuachi cuahá ñayivi. Ta tandaa quivi quixi tucu mé á ñuyíví yóho joo a quíví ga ña jáchí quixi a ndiquehe a na ndáti tiahva cuhun coo xihín mé á indiví.

10

1 Ta mé ley nacahyí Moisés yóho nasacuu a tátuhun in candahvi mé ña ndaa ña coo chága chinuu. Nasacuu a yuhú nuu uun ña vaha ña vaxi nu yo. Jáchí mé ley yóho coó nacuu caja ndaja vií a ínimá ñayivi vatí ná cayati na nu Ndióxi tá nu cuía sá sáhní na quítí joco na nu Ndióxi.

2 Jáchí tá ná cuu ndivií ínimá ná sahá ña cája na ña cáchí ley Moisés já queá in tañu cuití va joco na ñi quítí nu Ndióxi, nduu. Ta xihín ña yóho ndoo cuachi na ta a ndícani ga ini na sahá cuachi na, nduu.

3 Joo tá nu cuía tá sá sáhní na quítí joco na ñi rí nu Ndióxi já queá ndicuhun ini na ña cómi na cuachi nu Ndióxi.

4 Jáchí a cuú jándoo na cuachi na xihín ñi tindiquí á xihín ñi tijúhu.

5 Ña cán quea tá jalóho cúni casaa Jesucristo ñuyiví yóho já nacachi a já xihin Ndióxi, tátá a:

Có cúni ndó ña ná cahní ñayivi quíti joco na rí nu ndo ta ni có cúni ndo ña ná joco na java ga ñaha nu ndo.

Sahá ña cán quea nasahan ndó in yiquí cuñu nuú i já ná ndiquiahva i ña nu ndo.

6 Có cájji ini ndó tá ná cahmi na quíti nu náa joco na rí nu ndo. Ta ni có táhán ini ndó tá ná joco na java ga ñaha nu ndo ña ná jándoo na cuachi na.

7 Sahá ña cán quea já nacachi i já xihin ndo:

“Tátá Ndióxi, yóho ín i ta ín tiahva vi caja i ndá ña nacuu cúni ndo.

Jáchi quiahva já ndáa ini tuhun mé ndó sahá i”, nacachi Jesucristo.

8 Nu cuítí nacachi Jesucristo ña có cúni Ndióxi ña ná cahní ñayivi quíti quiahva na ñii rí nu á. Ta ni có táhán ini a tá ná cahmi na quíti nu náa ña ná ndivií ínimá ná. Ta nacachi a ña yóho vatí sáhdá ley Moisés caja ñayivi já.

9 Joo tá nandihí nacachi Jesucristo já xihin Ndióxi: “Yóho ín i ta ín tiahva vi caja i ndá ña nacuu cúni ndo”, nacachi a. Ña cán quea nasacu xóo Ndióxi ña nacaja na jihna ta viti ndíquehe vaha mé á ñayivi sahá ña ñaxihí Jesucristo ndica crúxu.

10 Nacaja Jesucristo ña nasacu ini Ndióxi caja sahá ña cán quea nacandoo víi uun tóco ndihí mí jáchi in tálaa tañu nandiquiahva Jesucristo yiquí cuñu a tá ñaxihí a sahá cuachí.

11 Jihna ga ña nacaja ndihí jutú cúu á ña nini quiví sándita da nu náa jóco da quíti nu Ndióxi. Ta

vatí cuahá tañu sá cája da já joo a cuú jándoo da cuachi ñayivi xihín ña yóho.

¹² Joo in tañu cuití va naxihí Jesucristo sahá cuachi tóco ndihi ñayivi já ná cuu cacu ndaa ínima ná anda ama cáa quivi. Anda jáví nasacoo a xoo cuáha Ndióxi, tátá a indiví.

¹³ Ta cán ín coo a viti cándati a janda quiahva ná cacu Ndióxi na cándají mé á tixi sahá.

¹⁴ Jáchi in tálaá tañu naxihí Jesucristo ndica crúxu ta xihín ña yóho nandaja víi a ínima ñayivi, na nacaxi mé á.

¹⁵ Ta sa xíni yo ña cúu ña yóho ña ndaa jáchi já cáchi ínima yíi Ndióxi já:

¹⁶ Vaxi quivi tá quiahva i tuhun saá nuú ñayivi Israel ta quiahva johu coo a.

Caja i ña ná candaa vaha ini na ley mí i ta caja i ña cañuhu a ini ínima ná.

¹⁷ Ta já cáchi tucu a já:

Caja cáhnu ini i sahá ndaja táhan ña núu nacaja na ta a ndicuhun ga ini i sahá cuachi na, cáchi tuhun Ndióxi.

¹⁸ Ta sahá ña nacaja cáhnu ini Ndióxi sahá cuachi ñayivi sahá ña cán queá co xíni ñúhú ga cahní na quití ña joco na rí nu mé á sahá cuachi na.

Xíni ñúhú cayatí nu Ndióxi

¹⁹ Candehé ndo, ñani i, na cúu cuénta Jesús. A cáyihví toho í viti ndihví nu ín Ndióxi, mé nuú yíi ndivaha jáchi naxihí Jesucristo sahá cuachí.

²⁰ Ta tá nandiquiahva mé á yiquí cuñu a já naxihí a ta xihín ña yóho nasuná a íchi saá já ná cuu cayatí nu ín mé á.

21 Ta mé Jesús cúú á jutú sacuaḥa saḥa yō nu Ndióxi jáchi cómi a cuéntá saḥá ndihí, na cúú cuéntá mé á.

22 Ña cán quéa xíní ñúhú cayatí nu ín Ndióxi xihín ndinuhu iní jáchi cándeé iní mé á. Cúú á tátuhun nandoo yiquí cuñu í tá naḥihí Jesucristo ndica crúxu. Ta viti cō ndítahan ndicani iní saḥá cuachi naḥaja í jáchi najándoo mé á cuachí.

23 A jándacoo í ña cándeé iní Ndióxi ta ná candati tiaḥva í janda ná yaḥa ña cáchí mé á jáchi xíní vaḥa í ña jáxinu cō Ndióxi tuhun naḥan nu yō.

24 Ta ndítahan nu yō ndinducú yō ndaja caja í chindeé táhan í já ná quihví chága iní ñani táhan í. Ta ndítahan caja chága yó ña vaḥa.

25 Cō ndítahan toho caja í tá quiaḥva cája java na cúú cuéntá Jesús, na cō cúní nditaca xihín ndihi java ga na cúú cuéntá Jesús. Ña ndítahan caja í quéa jácaḥan chága táhan í ña ná taca í xihín java ga na cúú cuéntá Jesús jáchi sa xíní yō ña vaxi quivi quixi tucu Jesucristo ñuyíví yóho.

26 Tá sa cándaḥa vaḥa iní ña cō ndítahan caja í cuachi ta chíñee tucú mí cuahan í cája í cuachi vatí sa cándaḥa iní ña ndaḥa, a cuú ga ndoo cuachí nu Ndióxi.

27 Ta cáyihví yō candatí janda quiaḥva ndoho ndivaḥa iní caja Ndióxi. Jáchi jácana mé á ñayivi nu ñúhu cáyi ita, mé nu ndihi saḥá na ihví mé á.

28 Jáchi ndá na Israel, na cō cúní caja ña sáhdá ley Moisés já quéa ndítahan quivi na tá ná cacu iví á uní testigo saḥá na nu juéxe. Ta ni in na a cándaḥví iní ñahá.

29 Joo ndaja ga ví ndítahan ndoho ini na quéhe núu Jesús, mé in túhún jiní já jaḥyi Ndióxi. Jáchi

cúú á tátuhun sání nihni na a ta co sáhní toho na mé ná ña naxihí a jándoo a cuachi na tá quiahva nasahan Ndióxi tuhun a caja. Cánahá na xihín ínima yíi Ndióxi, mé a cája cuahá ñamaní xoho.

³⁰ Cándaa vaha iní yo cúú mé a nacachi ña yóho: “Yehe jándoho i ini ñayivi, na cája cuachi. Ta caja i ña ná chahvi na sahá cuachi na”, cáchí a. Ta já cáchí tucu Ndióxi, xitoho í já: “Yehe caja víi i sahá na cúú cuéntá mí i”, cáchí a.

³¹ Mé a ndaa ndáhví nahá nacuu tá ná tiin Ndióxi mí ña ná chahví sahá cuachí jáchi mé á cúú á Ndióxi, ña tácu indiví.

³² Ndítahan ndicuhun ini ndó ña nayaha tá jacá nacandee ini ndó Jesús. Vatí nandoho ndivaha ini ndó nacaja java ñayivi joo nasahan ndee ini ndó.

³³ Java tañu nasacu ndaa ichi na ndohó nuú ñayivi ta java tañu nacaja xíxi na xihín ndo ta java tañu nacatáhan ndó xihín java ga na tá nandoho ri ini na sahá Jesús.

³⁴ Ta táhnda ini ndó sahá na cúú cuéntá Jesús ñúhu vecaa. Ta coo nacahan cuachí ndo ta janda cájii ini ndó vatí nacaja cuíhna na ñaha ndó jáchi cándaa vaha ini ndó ña cómi ndó ña vaha chága indiví ta a ndíhi toho sahá ña cán.

³⁵ Ña cán quéa a jándacoo ndó ña cándee ini ndó Jesús jáchi tandaa quivi quiahva cuahá Ndióxi ña vaha nu ndo tá cándee ini ndó mé á.

³⁶ Ndítahan nu ndó quiahva ndee ini ndó caja ndó ña cúní Ndióxi já quéa ndiquehe ndó ña vaha nasahan mé á tuhun a quiahva nu ndo.

³⁷ Jáchi já cáchí tuhun Ndióxi já: Jalóho cúní ta já quixi mé a ndítahan nuu quixi ta a cáyáncá toho a.

38 Joo ndá n̄a cúu ñ̄ayivi ndaā n̄u mí i catacu na sahá ñ̄a cãndeé ini na yehe.

Ta tá co cúni ga n̄a cãndeé ini na yehe ta já ndicó coo na caja na cuachi já quéa a cájii ín̄i i xih̄in ná, já cáchí Ndióxi.

39 Joo a cája toho í tá quiahva cája java ñ̄ayivi jáchi co cúni n̄a cãndeé ga ini na Jesús ta tandaa quivi cuhun n̄a indayá. Joo mí cúu yó n̄a cãndeé ini Jesús ta tandaa quivi coo í n̄u ín̄ mé á.

11

Ndítahan n̄u yó cãndeé ini Ndióxi

¹ Tá ná cãndeé ini Ndióxi já quéa cúni cachi a ñ̄a sa xini vaha í ñ̄a yaha tá yaha ñ̄a ndátí yó yaha. Ta vatí co xini yó ñ̄a ndátí joo cãndeé ini ñ̄a já coo.

² Jáchi sahá ñ̄a ñ̄acãndeé ini tásáhn̄u jícó yo Ndióxi sanahá ndivaha sahá ñ̄a cán quéa cájii ini Ndióxi xih̄in ná.

³ Ta sahá ñ̄a cãndeé ini Ndióxi sahá ñ̄a cán quéa cándāa vaha ini ñ̄a ñ̄acahan Ndióxi ta já ñ̄acavaha mé á ñ̄uyívi xih̄in indiví. Jihna coó ñ̄asah̄iin ni in ñ̄aha joo viti náha nuú ñ̄a ñ̄acavaha mé á.

⁴ Ta sahá ñ̄a ñ̄acãndeé ini da naní Abel Ndióxi sahá ñ̄a cán quéa ñ̄atahan ini Ndióxi xih̄in ñ̄a ñ̄acaja da tá ñ̄ajocó da ñ̄aha n̄u á. Ta coó ñ̄atahan ini a xih̄in ñ̄a ñ̄ajocó da naní Caín, da cúu ñ̄ani Abel jáchi coó ñ̄acãndeé ini Caín mé á. Sahá ñ̄a cán quéa ñ̄andiquehe Ndióxi ñ̄a ñ̄ajoco Abel n̄u á ta xih̄in ñ̄a yóho ñ̄anduu da da ndaā n̄u á. Ta vatí ñ̄axih̄i Abel joo xih̄in ñ̄a ñ̄acaja da sanahá jánaha da n̄u yo ndaja ndítahan n̄u yó cãndeé ini Ndióxi.

5 Ta sahá ña ñacandeeé ini da naní Enoc Ndióxi sahá ña cán quéea coó naxihí toho da. Joo ñasañehe Ndióxi da indiví ta coó ñacuu ndiñehé ñayivi mé dá jáchi ñandaa da cuahan da indiví ñacaja Ndióxi. Ta cáchí tuhun Ndióxi já ñacaja mé á jáchi táhán ini a xihín ña ñacaja Enoc nani ñasahjin da ñuyíví yóho.

6 Tá co cándeeé iní Ndióxi já quéea co táhán ini Ndióxi xohó. Jáchi ndá ña cúní cayati nu Ndióxi xíní ñúhú cándúsa na ña ín mé á indiví ta xíní ñúhú cándúsa na ña quiahva mé á ña vaha nuú ñayivi tá ndinducú ña mé á.

7 Ta sahá ña ñacandeeé ini da naní Noé Ndióxi sahá ña cán quéea ñataa johó da tá ñacaxi tuhun Ndióxi xihín dá ña ndoho ini ñayivi chága chí nuu vatí coó ñasanaha nu á. Ñacandúsa Noé Ndióxi ta chí ñacasáhá da cávaha da in barco cáhnu nuú cuu cacu ndaa mé dá xihín ña vehe da. Ta sahá ña ñacandeeé ini da Ndióxi sahá ña cán quéea ñanduu da ñaa ndaa nu mé á. Ta xihín ña ñacaja da najácojo da cuachi jatá ñayivi ñuyíví jáchi náha cáxi a ña coó ñacandúsa na caja na ña cáchí Ndióxi.

8 Ta sahá ña ñacandeeé ini da naní Abraham Ndióxi sahá ña cán quéea ñacandúsa da ña ñacahan Ndióxi xihín dá. Ta chí ñaquee da ñuu da ta cuahan da in ñundáhyi, ña ñasahan Ndióxi tuhun a quiahva nu dá. Najándacoo da ñuu da vatí coó ñasaxíni da ndaja naní mé ñuu nuú cuhun da.

9 Ta sahá ña cándeeé ini Abraham Ndióxi sahá ña cán quéea naxinu coo da ñundáhyi ña ñasahan Ndióxi tuhun a quiahva nu dá. Joo ñandiñehe dá java ñayivi ndúu cán chí ñasahjin da tá quiahva ndúu ña tóho. Vehe tienda ñasahjin da xihín ña

vehe da. Ta quiahva já nasahin Isaac xihin Jacob jáchi nasahan Ndióxi tuhun a nu mé dá xihin nuú na vehe da.

¹⁰ Nacaja Abraham ña yóho jáchi ndáti da coo da in ñuu ña in indiví, ña nacavaha Ndióxi nuú coo a anda ama cáa quivi.

¹¹ Ta jári nacandee ini Sara, mé ñájihí Abraham Ndióxi sahá ña cán quea nacaja Ndióxi ña nacuu quee jahyi ña vatí sa nacayatá ña. Ta tá nandihí já nacacu jahyi ña ta nasacuu a sahá ña nacandee ini ña jáxinu coo Ndióxi tuhun nasahan nu ña.

¹² Sahá ña cán quea vatí nacayatá ndivaha Abraham ta nacayati quivi quivi da joo nacacu jahyi da xihin ña ta nanduu da tásáhnú jícó na Israel. Ta cuahá ndivaha na cúu chichi da janda a cúu candahvi na. Cúu á tátuhun quimi ña in indiví á tátuhun ñuti yuhú tañuhú jáchi a cúu candahvi a.

¹³ Tóco ndihí na naquixi chichi Abraham yóho vatí naxihí na joo nacandee tá nacandee ini na Ndióxi. Ta vatí coo naxini na ña nasahan mé á tuhun a quiahva nu ná joo nasacuu a tátuhun naxini na ña. Jáchi nacandee ini na ña nacachi Ndióxi xihin ná ta nacajii iní na. Ña cán quea nacachi na ña ndúu tóo cuití na ñuyívi yóho ta cúu ná tátuhun na tóho jáchi coo ñuu na ñuyívi yóho.

¹⁴ Cándaa iní ña ndá na cáchí já cúní cachi a ña ndinducú na inga ñuu nuú canduu na.

¹⁵ Ta coo natahnda ini na sahá ñuu naquee na cán jáchi cuu ndicó coo na, nduu joo coo nacacúni na caja na ña.

¹⁶ Joo ña ndúcú na cúu in ñuu ña vaha chága, ña in indiví. Ta nacaja tiahva Ndióxi mé ñuu indiví

nuú cuu coo na já quéa a cácahan nuu mé á cachi a ña cúu ná cuéntá mé á.

17 Ta sahá ña ñacandeeé ini Abraham Ndióxi sahá ña cán quéa ñasahjin tiahva da cahní da Isaac, jahyi da joco ñahá da nu Ndióxi tá naxito ndojó Ndióxi da. Já ñacaja Abraham vatí ñasahjin in túhún jiní jahyi da ta sa ñasahan Ndióxi tuhun a nu Abraham

18 tá ñacachi a já xihin dá: “Cacu jahyún, da cananí Isaac ta xihín da cán ndicuahá ndivaha chichún chága chí nuu”, ñacachi Ndióxi.

19 Sa ñacandaá vaha ini Abraham ña cuu caja Ndióxi ña ná nditacu tucu Isaac tá sa naxihí da. Ta vatí coó ñasahní toho Abraham Isaac joo cúu á tátuhun naxihí da ta nanditacu tucu da jáchi ñasahjin tiahva da cahní da da sahá ña ñacandeeé ini da Ndióxi.

20 Ta sahá ña ñacandeeé ini Isaac Ndióxi sahá ña cán quéa ñasahan da tuhun da nu ndíví jahyi da, da naní Jacob xihín da naní Esaú ña caja cuaha Ndióxi ñamaní xihin ndíví da chága chí nuu.

21 Ta sahá ña ñacandeeé ini Jacob Ndióxi sahá ña cán quéa tá jalóho cúni quivi da já quéa ñacachi da ña caja cuaha Ndióxi ñamaní xihín ivi jahyi ñaní da, da cúu jahyi da naní José. Anda javí ñacaja cáhnu da Ndióxi nani tíin ndaa da garrote da.

22 Ta sahá ña ñacandeeé ini José Ndióxi sahá ña cán quéa tá jalóho cúni quivi da ñacahan da xihín na Israel sahá mé quivi tá ná quee na nación Egipto cuhun na. Ta ñasahnda da chuun nu ná ña ná cañehe na lasa yiquí cuñu mé dá cuhun ña xihin ná.

23 Ta sahá ña ñacandeé ini náná tátá Moisés Ndióxi sahá ña cán quéa tá nandihí ñacacu da já ñachicaan jehé ña ña ña tañu uní yoo. Náha ña cúu dá in lée ñúchí ndivaaha ta chí coó ñayihví toho na tuhun ñacahan rey cán tá ñasahnda da chuun ña quivi ndihí tavalí jacá ñacacu nuú ña Israel.

24 Ta sahá ña ñacandeé ini Moisés Ndióxi sahá ña cán quéa tá ñasahnu da najándacoo da vehe rey Egipto vatí najácuañu ña cúu jahyi jíhí rey cán da tátuhun jahyi ña.

25 Ta ña ñacaja da quéa ñasahan ña ñandoho ini da xihín ña cúu cuéntá Ndióxi. Jáchi co cúni ña cáji ini ña cája da cuachi vatí chá tiempo.

26 Ta ñacahan ña ña vaaha chága ná ndoho ini da saha Jesucristo, mé a chindahá Ndióxi cacomí cuéntá sahá ñayivi a juú ga ña ná cacomí ña cuahá ñaha cuíca nación Egipto cán. Jáchi ñacahvi ini da sahá ñamaní caja Ndióxi xihín ña chága chí nuu.

27 Ta sahá ña ñacandeé ini Moisés Ndióxi sahá ña cán quéa najándacoo da nación Egipto ta coó ñayihví ña ña ná ndicuehe rey Egipto cán xihín dá. Ta ñasahan ñeé ini ña jáchi ñaxica da tátuhun in ña xica xihín Ndióxi vatí coó ñaxini ña mé á.

28 Ta sahá ña ñacandeé ini Moisés Ndióxi sahá ña cán quéa ñasahnda ña ña chuun ña ná caja ña Israel vicó pascua. ñasahnda ña ña chuun ña ná cañí ña ndicachi ta já cuihna ndaa na ñi rí yuyehé vehe ña Israel ña ná a quíví jahyi ña ña ña ñacacu nu cuítí tá ña ña tátó Ndióxi, mé a cája ña ná quivi ñayivi.

29 Ta sahá ña ñacandeé ini ña Israel Ndióxi sahá ña cán quéa ñayaha na maññú ndaa tañuhú naní tañuhú cuahá. ñasacuu a tátuhun xica ña nu

ñundáhyi íchí uun. Joo tá ñacasáhá ña Egipto yáha na mé tañuhú cán já quéa coó ñacuu caja na ña. Ñacandaa na ini ticuúí ta já ñaxihí ndihi na.

³⁰ Ta sahá ña ñacandeeé ini na Israel Ndióxi sahá ña cán quéa ñacava nuu na ñuu Jericó tañu usa quivi ta já ñacuyu ndihi náma ñuu cán.

³¹ Ta sahá ña ñacandeeé ini ñá xíca jii naní Rahab cán Ndióxi sahá ña cán quéa coó ñaxihí ñá xihín ndihi ñayivi ñuu Jericó, ña coó ñacandúsa Ndióxi. Najácau Ndióxi Rahab cán jáchi sa ñandiquehe vaaha ñá java ta Israel tá ñacasaa da nu cuítí sánehé da ñuu cán.

³² Ndá chága cahan i xihin ndo. Sa ñacahan cuahá i xihin ndo joo cámani cahan i sahá da naní Gedeón xihín da naní Barac xihín da naní Sansón xihín da naní Jefeé xihín da naní David xihín da naní Samuel xihín java ga ña ñasacuu profeta.

³³ Sahá ña ñacandeeé ini ña cán Ndióxi sahá ña cán quéa ñaquee vaaha na tá ñacani táhan na xihín java nación ta ñasacomí vaaha na cuéntá sahá ñayivi ta ñandiquehe na ña vaaha ñasahan Ndióxi tuhun a quiahva nu ná. Java na ñachicaji na yúhu león.

³⁴ Ta java na ñandahva na ñúhu cáyi ña ná a cáyi toho na. Ta java na ñacacu na ndahá ñayivi, ña ñacacúni cahní ñahá xihin machiti. Ta java na vatí vitá ini na joo ñandihvi ndée ná. Ta java na ñaquee vaaha na tá ñacani táhan na xihín ña ihvi ña.

³⁵ Ta java ñajihí ñacandeeé ini na Ndióxi ta sahá ña cán quéa ñaxini na ña ñanditacu tucu ña vehe na ñacaja Ndióxi.

Joo java na ñandoho ndivaaha ini na janda

quiahva naxihí na. Ta coó nacandúsa na cacu xoo na Ndióxi jáchi nacandaa vaha ini na ña cuhun na coo na in ñuu vaha chága nu íin mé á.

³⁶ Java na nandoho ini na tá nasacu ndaa ichi ñahá na ta nacani ñahá na. Ta java na nasandico na xihin cadena ta nachicaan na na vecaa.

³⁷ Ta java na naxihí na jáchi nacuun ñayivi yuu ná ta java na naxihí na tá nasahnda túhun ñahá na. Ta java na naxito ndojó ñayivi na ña ná caja na cuachi. Ta java na naxihí xihin machiti. Ta java na nasandíxi na xihin níi ndicachi xihin níi tijúhu cuití va jáchi coó toho jiuhún na. Nacaja xíxi ñayivi xihin ná ta najándoho na ini na.

³⁸ Naxica ndáhví na nu íchí ndivaha ta naxica nuu na yucú ñúhú ta nasanduu na tíxi cáva xihin yávi nu ñúhu. Mé a ndaa cúu ná ñayivi vaha ndivaha ta co ndítahan nu ná ndoho ini na ñuyíví yóho.

³⁹ Ta cáji ini Ndióxi xihin tóco ndihi na cán jáchi nacandeeé ini na mé á. Joo cámani ndiquehe na ña nasahan mé á tuhun a quiahva nu ná.

⁴⁰ Jáchi cúní Ndióxi ña ná candati na cán anda tandaa quivi ndiquehe tóco ndihí ña vaha chága quiahva Ndióxi nu yo.

12

Ná candeeé ini Jesús cuití va

¹ Mé ñayivi cuaha cán naquee vaha na jáchi nacandeeé ini na Ndióxi. Ta jánahá na nu yo ndaja caja í ña ná quiahva ndeeé ini tá ná ndoho ini. Ña cán quea ná jándacoo í tóco ndihi cuachi cája í, ña tíin tuun mí. Ta ná jácaxoo í tóco ndihi ña sáji nuu

nu yō caja í ña cúnj Ndióxi. Ta ná candico yó íchi Ndióxi xihín ndinuhu iní tá quiahva ndítahan caja í.

² Ta ná candehé cáxí yō nuu Jesús jáchi mé á cán cája ña ná casáhá cándéé iní Ndióxi ta cája ña ná cándéé iní mé á anda tandaa quiví quiví. Nandoho ini Jesús tá naxihj a ndica crúxu ta coó nacacahan nuu á vatí cácahan nuu ñayivi quivi na quiahva já. Jáchi nacandaa ini a ña tá ná ndihi ndoho ini a já tandaa quiví cajji ndivaha ini a. Ta viti ín coo a xoo cuáha Ndióxi indiví.

³ Xíní ñúhú ndicuhun ini ndó ndaja nacaja Jesús jáchi a juú quiahva nandoho ini a ndahá ñayivi cája cuachi. Sahá ña cán quéa a jándacoo ndó ña cándéé ini ndó Jesús ta a cácuitá ínima ndó tá ndóho ini ndó.

⁴ Jáchi cámani yji va cahní na cája cuachi ndohó sahá ña co xeén ndó caja ndó cuachi.

⁵ Á nandindójó ndó tuhun nacahan Ndióxi xihín ndo sahá ña cúú ndó jahyi mé á. Já cáhí tuhun Ndióxi já:

Jahyi maní j, a quéhe núu ndó Ndióxi tá jándoho a ini ndó ña ná ndacaca vaha ndó.

Ta a cáva ivi joho ini ndó tá jánani mé á ndohó.

⁶ Jáchi já cája Ndióxi xihín na quíhvi ini a.

Jándoho a ini na já ná jándacoo na ña núu ta já nduu na jahyi mé á, cáhí tuhun Ndióxi.

⁷ Quiahva ndéé ini ndó tá cája Ndióxi ña ná ndoho ini ndó. Jáchi tá quiahva cája in da taa xihín jahyi da quiahva já cája mé á xihín ndo. Jáchi tóco ndihi dataa jácaxáhan da jahyi da já ná ndacaca vaha da.

⁸ Ta tá co jándoho Ndióxi ini ndó já quéa co cúú ndó jahyi mé á. Cúú ndó tátuhun jahyi ndáhví na. Joo

tá ná jándoho Ndióxi ini ndó já cándaḡ ini ndó ña mé a ndaa cúu ndó jahyi mé á.

⁹ Tá naṣacuú na valí naṣaja cáhnu yó tátá yo vatí najácaxáhan na mí. Joo ín chága saha caja cáhnu í Ndióxi, tátá yo, mé á ín indiví vatí jándoho a ini mí jáchi xihín ña yóho cuu coo í xihín mé á anda ama cáa quivi.

¹⁰ Tá valí yo najándacaca vaha tátá yo mí tá najánani na mí jáchi já vaha xíní na vatí mé ñuyiví yóho cúu á nu ndúu tóo cuití ví. Joo tá jánani Ndióxi, tátá yo, mí cúu á ña vaha chága jáchi xihín ña yóho ndaja yii á mí tá quiahva ín yii mé á.

¹¹ Mé a ndaa co táhán iní tá jánani na mí jáchi cáhiví yo xihín á. Joo tá nandíhi já coo vaha iní jáchi naṣatiahva í ndaja cáca vaha í sahá ña nandoho iní ta xihín ña yóho cacuu ñayivi ndaa nu mé á.

Ndítahan nu yó táa joho í nu cáhan Ndióxi

¹² Ña cán quea ndicuita ndó ta a jándacoo ndó mé ndó.

¹³ Ta ndinducú ndó ichí ndacú já ná cuu chindeé ndó ñayivi, na cáva ivi joho ini ña ná a ndícó coo na nuú cuachi.

¹⁴ Xíní ñúhú ndinducú ndó ndaja caja ndó coo vaha ini ndó xihín tóco ndíhi ñayivi. Jándacoo ndó cuachi cája ndó ta ndinuhu ini ndó caja ndó ña cúni Ndióxi já ná cuu coo ndó nu ín mé á.

¹⁵ Cuéntá coo ndó ná a jándacoo ni in ndó íchi cuéntá Ndióxi jáchi cúni a caja cuahá ñamani xihín ndo. Cuéntá coo ndó ná a cácuu ndó tátuhun in yucu ova ña jativí ña xíxi na jáchi na cája cuachi cája quini na ta jativí na java ga na cúu cuéntá Ndióxi.

16 Coto a quíhvi nuu ndó coo ndó xihín in na co cúu yí ndo á ñájihí ndo. Coto a quéhe núu ndó ñaha Ndióxi tá quiahva ñacaja Esaú. Jáchi in quivi cuico ndivaha da ta najicó da tóco ndihi ñaha ndítahan ndiquehe da nu tátá da sahá ña ná cuxu da in cohó cuití va.

17 Joo cándaá iní ña tá nandindaa nuu dá ndiquehe da ñaha ndáha tátá da coó ñacuu ndiquehe da ni in ñaha. Jáchi najicó da ña nuú ñani da sahá ña ná cuxu da in cohó. Ta vatí ñasacu ndivaha da joo coó ñacuu caja da ndijama da tühun da ña sa ñasahan da nuú ñani da.

18 Ta mé ndó coó ñacayati ndó nu Ndióxi tá quiahva ñacaja na Israel sanahá. Mé na cán ñataca na saha in yucu naní Sinaí xihín da naní Moisés. Ta ñacayi ñúhu cán ta ñanaá ndivaha ta ñaxicó ndivaha tachí ñaxini na.

19 Ta ñaxini johó na ñativi trompeta ta ñacahan Ndióxi xihín ná. A juú quiahva ñayihví na tá ñaxini johó na nu cáhan Ndióxi chí ñaxica tahví na nu á ña ná a cáhan ga xihín ná.

20 Jáchi coó ñacandeé ini na táa johó na ña sáhdá Ndióxi nu ná tá ñacachi a já: “Tá ná cani ndaa in ñayivi á in quíti yucu Sinaí yóho já quéa xíní ñúhú cuun ndó yuu ná á tuxú ndó na xihín póyá anda ná quivi na”, cáchi Ndióxi.

21 Ta a juú quiahva ñayihví na sahá ña ñaxini na cán. Ta anda Moisés vití ñayihví ndivaha da ta já ñacachi da já: “Quíji ñinu i xihín ña yíhvi i”, cáchi da.

22 Joo ña ñacaja mé ndó quéa sa ñacayati ndó in nuú naní Sión, mé nu ín Ndióxi, mé a tácu indiví.

Mé ñuu cán cúú á tátuhun inga Jerusalén, ña ín indiví ta ndúu cuaha mil tátó Ndióxi cán.

²³ Sa ñataca ndó cán caja cáhnu ndó Ndióxi xihín tóco ndihi ñayivi, na mé a ndaa cúú jahyi Ndióxi, mé na ndaa quivi nu libro Ndióxi indiví. Ta sa ñacasaa ndó nu Ndióxi, mé a cája vii saha tóco ndihi ñayivi. Ta ñataca ndó xihín tóco ndihi ñayivi, na sa ñaxihí sanahá, mé na sa ñanduu ndaa nu Ndióxi ñacaja mé á.

²⁴ Ta sa ñacayati ndó nuú Jesús, mé a cáhan xoo mí nu Ndióxi. Jáchi sahá ña ñacaja Jesús tá ñaxita nii á ndica crúxu sahá ña cán quéa ñasahan Ndióxi tuhun a nu yo ña ná ndoo cuachí. Joo jín va ñacaja Ndióxi tá ñaxita nii Abel sanahá ndivaha jáchi najándoho a ini ñani da, da naní Caín sahá ña ñasahní ñahá da.

²⁵ Cuénta coo ndó já ná a quehe núu ndó nu cáhan Ndióxi xihín yo. Jáchi ñayivi cán, na coó ñaxeen cája ña cáchi Ndióxi ñachahvi na sahá ña núu ñacaja na mé ñuyívi yóho. Ta já caja ri Ndióxi xihín mí tá ná quehe núu í tuhun mé á jáchi janda indiví ín mé á cáhan xoho.

²⁶ Mé tiempo cán najátaan Ndióxi ñuyívi yóho tá ñacahan mé á. Joo já cáchi a já viti: “Vaxi quivi ta játaan tucu i ñuyívi ta mé tiempo cán jáquiji nuu i indiví viti”, cáchi a.

²⁷ Tá ñacachi Ndióxi ña inga tucu játaan mé á ñuyívi yóho já cándaá iní ña ndihi sahá ñaha ñacavaha mé á. Ta tóco ndihi ñaha, ña a cuú quiji nuu, ña cán coo a anda ama cáa quivi.

²⁸ Ñehe táhvi yo coo í nuú cacomí Ndióxi cuénta saha yo ta mé cán a cuú quiji nuu a. Sahá ña cán quéa ná ndiquiahva í ndixahvi nu Ndióxi ta ná caja

cáhn̄u í mé á x̄ihín ndinuhu iní jách̄i cáj̄i ini mé á x̄ihín ñ̄a yóho.

²⁹ Jách̄i mé a ndaa Ndióxi cúú á tátuhun ñúhu ñ̄a cáyi ñ̄a jándihi sahá ñ̄aha. Ñ̄a cán quéea caja mé á ñ̄a ná ndihi saha tóco ndihi cuachi.

13

Ná caja í ñ̄a táhán ini Ndióxi x̄ihín

¹ A jándacoo ndó ñ̄a quíhvi ini ndó na cúú cuéntá Jesús jách̄i cúú ná tátuhun ñ̄ani ndó á quiahva ndó.

² A ndíndójó ndo ndiquehe vaha ndó na tóho tá ná casaa na vehe ndó jách̄i x̄ihín ñ̄a yóho java na nandiquehe vaha na tátō Ndióxi vatí coo nacandaa ini na ñ̄a.

³ A ndíndójó ndo sahá ñ̄ayivi ñúhu vecaa ta xíní ñúhú tahnda ini ndó x̄ihín ná jách̄i xíní ñúhú cacuu a tátuhun ndácaan mé ndó vecaa x̄ihín ná. Ta a ndíndójó ndo sahá ñ̄ayivi, na cája x̄ixi na x̄ihín ta xíní ñúhú tahnda ini ndó x̄ihín ná jách̄i cuu ndoho ini ri ndóhó va tá quiahva ndóho ini na cán.

⁴ Vaha va cája ndó tá tándaḥa ndo ta xíní ñúhú caja cáhn̄u ndó yíi ndo á ñ̄ájíhí ndo. Ta a ndúcú toho ndó coo ndó x̄ihín inga na jách̄i jándoho Ndióxi ini ndá na quíhvi nuu coo x̄ihín na coo cúú yíi na á ñ̄ájíhí na.

⁵ A ndiáva ini ndó cacomí ndó cuahá jjuhún. Ndítahan cajji ini ndó x̄ihín ñ̄a cómí ndo jách̄i já cáchí Ndióxi já: “A jándacoo toho i ndohó ta ní a ndíndójó i saha ndo”, cáchí a.

⁶ Sahá ñ̄a cán quéea cuu candeé iní Ndióxi ta cuu cachí já:

Mé á cúú Ndióxi, xitoho i ta chíndeé a yehe.

Ta a cáyihví toho i ndá ñaha ndúcú ñayivi caja na xihín i.

⁷ A ndíndójó ndo sahá na nasacomí cuéntá saha ndo ta ni sahá na naçaxi tuhun tuhun Ndióxi nu ndo. Candehé ndó ndaja naçaja na ñuyíví yóho jáchi naçandeeé ini na Ndióxi anda quiahva naxihi na. Ta ndítahan nu mé ndó candeeé ini ndó a tá quiahva naçaja na cán.

⁸ Co ndíjama toho Jesucristo. Tá quiahva nasacuu a sanahá ndivaha quiahva já cúu ri a anda viti ta quiahva já coo a anda ama cáa quívi.

⁹ A quiahva toho ndó ñamaní nuú ñayivi ña ná jándahvi na ndohó xihín ña jánaħa na nu ndo. Jáchi cúu á sahá ñamaní cája Ndióxi xoho ña ndíndacú ínimá yo. Ta co cúu á sahá ña jánaħa java ñayivi tá cáchi na ña a cúu cuxú java ñaha ña ná nduu ndaa ínimá yo. Mé a ndaa ña yóho co chindeé a mí.

¹⁰ Tá naxihi Jesucristo ndica crúxu já najoco a mé á nu Ndióxi saha yo. Joo jín va naçaja jutú cuéntá na Israel sanahá tá najoco na quítí nu Ndióxi.

¹¹ Jáchi da cúu jutú sacuaħa nasañehe da ñii rí naxihi cán ini veñuhu nuú yii ndivaha ta já najoco da dó nu Ndióxi sahá cuachi ñayivi. Joo natavá da yiquí cuñu rí jatá ñuu nu sáhmi na rí.

¹² Ta quiahva já naxihi Jesús jatá ñuu Jerusalén. Ta naxita ñii a ña ná jándo a cuachi ñayivi.

¹³ Ña cán quea cóho nuú Jesús. Cúu á tátuhun cuhun í jatá ñuu ta a cácahan nuú yó ndoho iní xihín mé á.

¹⁴ Jáchi ñuyíví yóho cóo toho ni in nuú cuu coo í anda ama cáa quívi. Joo ndínducú yo inga ñuu nuú cuu coo í chága chí nuu.

15 Còhò caja cáhnu í Ndióxi níí tiempo ta chindeé Jesús mí caja í ña. Ta ña yóho cúú á tátuhun ña jóco yo nu mé á sahá ña nacaja tá naxihí a ndica crúxu. Còhò caja cáhnu í mé á xihín yúhu yo jáchi cúú yó cuéntá mé á.

16 A ndíndójó ndo caja vaha ndó ta ná chindeé ndo ñani táhan ndó xihín ña cómi ndo. Jáchi ña yóho cúú á tátuhun ñaha jóco ndo nu Ndióxi ta cájii ini mé á xihín á.

17 Candúsa ndó na cómi cuéntá saha ndo ta caja ndó ña cúní na. Jáchi nasahan Ndióxi chuun yóho nu ná. Ta tandaa quivi nditahan ndicani na nu Ndióxi sahá ña nacaja na. Caja ndó ña cúní na já ná cajii ini na ta ná a cóo cuéha ini na jáchi a cuú quee vaha ndó já.

18 Caça tahví ndo nu Ndióxi sahá nde jáchi nandivií ínimá nde ta cúní nde caja vaha nde níí tiempo.

19 Caja ndó ñamaní caça tahví ndo sahá i ña ná quiahva Ndióxi ñamaní nuú i saa yachi i nu ndó coto nihni i ndohó.

Xihín tūhun yóho ndihi carta yóho

20 Ña cúní quéa ná quiahva Ndióxi ña ná coo vaha iní. Mé a cán najánditacu tucu a Jesucristo, mé a cúú xitoho í. Ta sahá ña nacaja Jesucristo tá naxita nii a ndica crúxu sahá ña cán quéa nasahan Ndióxi tūhun a nu yo ta a ndíhi toho sahá. Ta mé Jesús cómi a cuéntá saha yo tá quiahva in pastó cómi da cuéntá sahá ndicachi jana dá.

21 Ta ná caja Ndióxi ña ná ndindacú ínimá ndó já ná cuu caja ndó tóco ndihi ña cúní a. Ta sahá ña nacaja Jesucristo ná caja Ndióxi xihín yo ndá

ñã nacuu ñã táhán ini mé á xih̄in. Ná caja cáhnu í Jesucristo andã ama cáa quiv̄i. Já ná coo.

²² Xíca tahv̄i í nu ndo ñã ná coo cáhnu ini ndó xih̄in tuhun cáhan í xih̄in ndo, ñani í, ña cúú cuéntá Jesús. Jáchi carta loho cuití va ñacahȳí í nu ndo já ná ndindaćú ínima ndo.

²³ Ta cáxi tuhun í xih̄in ndo sahá Timoteo, mé da nasandacaan vecaa joo sa najani dá viti. Tá ná casaa yachi da yóho já saa da xih̄in í coto nihni nde ndohó.

²⁴ Cah̄an Ndióxi ndó xih̄in tóco ndihi ña jánaħa tuhun Ndióxi nuú ñayivi ta cah̄an Ndióxi ndó xih̄in tóco ndihi ña cúú cuéntá Jesús. Tóco ndihi ña cúú cuéntá Jesús, ña ndúu nación Italia yóho chíndahá ña Ndióxi coo ndó.

²⁵ Ná caja cuaħa Ndióxi ñaman̄i xih̄in tóco ndihi ndó. Já ná coo.

**Tuhun saá ña najá^{ndacoo} Jesucristo nu yo: El
Nuevo Testamento en el mixteco de
Silacayoapan
New Testament in Mixtec, Silacayoapan
(MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

7f2d3ecf-6d15-55a5-9081-6e970474df2f